

Кондак 1

Взбранной Воеводе, Пренепорочней Деве Богородице, земли Калужский Избавительнице, хвалебныя песни приносим Ти, раби Твои, яко иконы Твоя явлением даровавшей нам стража неусыпна. Ты же моления нашего, пред иконою Твоею возносимаго, не отвержи, но защити ны, Владычице, от всех врагов видимых и невидимых, и избави ны от всяких болезней душевных и телесных, да во умилении сердец зовем Ти:

Радуйся, Владычице, милость Свою нам и заступление являющая.

Икос 1

Ангелов множество славит Тя, Царицу всех и Богородицу: Ты бо исполнила еси радостию сердца наша явлением чудотворный иконы Твоя в Тинкове и чудеса во храме имене Рождества Твоего в веси Калужке, ейже поклоняющися, Тебе, Богоизбранная Дево, моления возносим, со страхом и любовью глаголюще:

Радуйся, от патриархов прообразованная и от пророков предвозвещенная;

Радуйся, Агнице, рождающая Агнца, взявшего грехи мира.

Радуйся, Адама и Еву от древняго проклятия свободившая;

Радуйся, чудотворным образом Твоим всю землю Калужскую озаряющая.

Радуйся, святую икону Твою в знамение милости Твоя нам давшая;

Радуйся, яко на икону Твою взирающе, Самой Тебе истинней Богородице поклоняемся.

Радуйся, Владычице, милость Свою нам и заступление являющая.

Кондак 2

Видя начертание Лица Твоего, девица Евдокия в развращении сердца своего дерзновенно оплеванием поругася ему, не ведущи, яко сей Твой Лик есть, Пресвятая Дево, Ты же, вразумления ради, наказала еси ю расслаблением всего телесе, слячением руку и ногу, ослеплением очию и отъятием языка и сим показала ей, яко начертание Лица сего есть икона Твоя чудотворная, да вси людие вопиют к рождшемуся от Тебя Богу Слову: Аллилуиа.

Икос 2

Разум человеческий не может постигнуть великаго Твоего милосердия, Пресвятая Богородице, яко искреннее покаяние болящая девицы прияла еси и совершенное исцеление той даровала еси, да молитвы приносит пред иконою Твоею, взывая сице:

Радуйся, Лестнице небесная, Иаковом предвиденная;

Радуйся, тайну воплощения Сына Божия, от веков в Бозе сокровенную, открывшая.

Радуйся, ведущим брань противу плоти, мира и диавола добрая Споспешнице;

Радуйся, от грехопадений наших, имже несть числа, избавляющая.

Радуйся, яко призывающий Имя Твое от падения страстного воссташа;

Радуйся, благодатное безстрастие ищущим его усердно

подающая.

Радуйся, Владычице, милость Свою нам и заступление являющая.

Кондак 3

Силою, данною Ти свыше, чудотворную икону Твою, Пресвятая Богородице, даровала еси нам в знамение милости Твоея, явльшиися нощию родителям тоя девицы, и рекла еси им: "Буду ходатайствовати о граде Калуге и всех людех страны сея". Мы же, взирающе на икону Твою и множество чудес, от нея изливающихся, видяще, с радостью к ней припадаем и из глубины сердца благодарим Тя, дивную Заступницу, воспевающе Богу: Аллилуиа.

Икос 3

Имущи о Церкви Христовой попечение и видяще, яко посреде обитателей земли Калужския живут люди неции, святых Христовы Церкви отвергшиися, Ты, Пресвятая Богородице, непремное желание изрекла еси: "Да вси чтут Православную Церковь". Родителем же тоя девицы повелела еси, да совершенно будет молебствие пред Твоею иконою с освящением воды, и да окропит иерей оною дщерь их, болезнию пораженную, яко да исцелет от недуга своего; нас же спаси, о Госпоже Богородице, верою и любовью воспевающих Ти:

Радуйся, в защиту Церкви Православныя чудеса показующая;
Радуйся, хулителей Православныя веры невидимо наказующая.
Радуйся, Православныя веры ограждение и утверждение;
Радуйся, крепкая стено Церкви Православныя.
Радуйся, святителей веселие и благоговейных иереев

похвало;

Радуйся, иноков и инокинь благочестивых изрядная Покровительнице и неусыпная Блюстительнице.

Радуйся. Владычице, милость Свою нам и заступление являющая.

Кондак 4

Бурю напастей провидев, угрожавших краю нашему от озлобления Наполеона, устремившагося на землю Калужскую, святителе Евлампий моляшеся пред Твоею иконою, Богородице, о избавлении града Калуги и всея ея области от врагов; весть же прием, яко воинство вражие поражено бысть на реке Чернушке, благодарственно Богу возопи: Аллилуиа.

Икос 4

Слышавше милость Твою, Богородице, чрез Твою икону на поле брани близ веси Тарутино нам ниспосланную, егда явила еси ю на воздухе иноплеменником, якоже свидетельствовашу плененнии от них, и тако даровала еси победу воем россияем; мы убо, радуящеся о Твоей, Владычице, помощи, со упованием воспеваем Ти сие:

Радуйся, Купино неопалимая, боговидцем Моисеем предзримая;

Радуйся, от потопа греховнаго нас спасающая.

Радуйся, Кадильнице золотая, яко фимиам благоуханный

молитвы Твоя за ны к Богу Сыну Твоему присно возносящая;

Радуйся, праведно движимый гнев Божий на ны молением Своим скоро утоляющая.

Радуйся, яко явлением на воздухе иконы Твоея страх и трепет нападе на враги иноплеменные;

Радуйся, яко явлением иконы Твоея во время брани победу российстей рати подала еси.

Радуйся, Владычице, милость Свою нам и заступление являющая.

Кондак 5

Боготечная звезда явилася еси нам, Богородице, наша смыслы озарившая и на путь спасительный наставляющая, врагом же нашим была еси яко молния, устрашающая их и отражающая от нас, егда оный Наполеон, поразил рать нашу, понуди ю отъити ко граду Калуге, сам же, услышав сие, по Твоему, Милостивая Заступнице, повелению, вместо еже ко граду Калуге, иде по пути, его же сам разори и опустоши, ко оному граду и тако рать свою погуби. Сего ради, Твое крепкое заступление ведуще, со умилением глаголем Богу: Аллилуиа.

Икос 5

Проявльши велию любовь к людям, живущим во стране Калужстей, Пресвятая Богородице землю нашу сохранила еси и множество врагов, обышедших ю, далече от нея отгнала еси; сии враги наша уведеша, коль крепка есть помощь Божия Матере. Мы же Твое всемогущее заступление, нам бывшее, добре ведуще, в радости сердца воспеваем Ти сие:

Радуйся, Клеще таинственная угля Божественнаго, Исаием провиденная;

Радуйся, примирение наше с Богом соделавшая.

Радуйся, Спасителя падшим человеком Рождающая;

Радуйся, в годину брани помощь Твоею уповающих на Тя не оставляющая.

Радуйся, всемогущим заступлением Твоим от меча иноплеменных нас избавляющая;

Радуйся, без пролития крове одоление православным воином даровавшая.

Радуйся, Владычице, милость Свою нам и заступление являющая.

Кондак 6

Проповедница благознаменитаго чудесе явися некая жена во граде Боровске, юже врачеве никакоже возмогоша исцелити и рекоша, яко належит ей не по мнозе времени умерети. Она же, веру имущи, яко сила Божия всемогущая есть, не закосни просити, да в веси Калужке пред Твоею, Богородице, иконою совершенно будет о здравии ея молебствие, и по вере своей абие от недуга своего исцелена бысть. Темже и мы, благодарственно прославляюще Бога, вопием Ему: Аллилуиа.

Икос 6

Возсияла еси икона Твоя, Богородице, чудеснаго ради исцеления жены, живущия во граде Боровске, даже и посреде

жителей его, в расколе пребывающих; сего ради и синклит градский, в нем же по преизбыточеству бяху людие в расколе упорствующие, устави: да будет совершенно на стогнах града молебное пение пред Твоею иконою, яже принесена бысть во град сей; прежде же николиже в онь бяхе приносима. Темже, яко Благая Владычице, научи ны разумети промышление Божие о нашем спасении, да взываем Ти радостно:

Радуйся, Двери, Иезекиилем прореченная;

Радуйся, вочеловечению Единого от Святыя Троицы непорочно послужившая.

Радуйся, рождением Сына Твоего спасение миру являющая;

Радуйся, с верою имя Твое призывающих от смерти спасающая.

Радуйся, сущих в расколе на путь благий обращающая;

Радуйся, Божественную веру прославляющая, прелесть же раскола посрамляющая.

Радуйся, Владычице, милость Свою нам и заступление являющая.

Кондак 7

Хотящи возгрети в сердцах людей страны Калужский любовь к иконе Твоей, Заступнице наша, токи чудес изливаеши от Твоея иконы: молитвою бо к Тебе возносимою глухому внезапно слух даровася; ослепшему зрение открыся; расслабленному крепость возвратися; здравие душою страждущей и бесом одержимей дадеся; люте болящей и врачами оставленной житие во здравии на многая лета продолжися; темже и мы, с любовью к иконе Твоей припадающе и прославляюще Бога, вопием Ему: Аллилуиа.

Икос 7

Необоримая еси отрада, охраняющая ны от всяких болезней душевных и телесных, Пресвятая Богородице, и заступающая всех к Тебе прибегающих с молитвою. Темже и мы, припадающе ко иконе Твоей, молим Тя, Владычице, избави ны от всяких болезней душевных и телесных, вопиющих Ти из глубины сердца:

Радуйся, Солнце селения Христова, псалмопевцем предъявленное;

Радуйся, Рождшая Избавителя, беззакония наша туне очищающего.

Радуйся, Стамно Пресвятая, в Ней же алчущим правды соблюдается Хлеб Жизни Вечныя;

Радуйся, яко всякия болезни душевныя и телесныя милостивно врачуеши с верою к чудотворней Твоей иконе приходящия.

Радуйся, болезнующих, оставленных врачами, от смерти избавляющая;

Радуйся, яко молитвами Твоими престают тлетворнии ветры и смертоноснии язвы.

Радуйся, Владычице, милость Свою нам и заступление являющая.

Кондак 8

Великое и уму человеческому неудобопостижимое чудо явила еси, Владычице мира, егда внезапно исцелила и укрепила еси в

трезвенном житии некую жену, в области града Жиздры живущую, яже пьянству предана бысть; та бо совестью своею терзашеся, яко страстию порока поработана бысть, и сея ради вины обратися с верою к Тебе, Владычице, молящися пред Твоею иконою, и от Тебе исцеление получи. Сего ради и мы, на милость Твою уповающе, восхваляем Твое милосердие, зывающе Богу: Аллилуиа.

Икос 8

Видят и слышат жители Калужския земли новую купель Силоамскую, паче оная древняя явльшуюся, Пресвятая Богородице, в храме Рождества Твоего в веси Калужке, в немже не единожды бо в лето и не точию первее входящий здравие приемлет, но выну всяк недуг врачуется всех с верою к Тебе прибегающих. Сего ради вопием Ти:

Радуйся, Еяже ради ад стенет и дуси злобы трепещут;

Радуйся, Еяже ради врата рая всем нам отверзаются.

Радуйся, помощь Твою святую благовременно подающая всякой души, верно Тебе молящейся;

Радуйся, от страсти к пьянству обратившихся к Тебе с молитвою избавляющая.

Радуйся, от рова погибельнаго безнадежных извлекающая;

Радуйся, притекающих к покрову Твоему сладкое упокоение.

Радуйся, Владычице, милость Свою нам и заступление являющая.

Кондак 9

Вси гордынею одержимии страх Божий скоро забывают: сице две жены, в стране Калужстей живущии, гордынею преисполнении, ясно являста сомнение свое, яко икона Твоя цельбоносна есть, Владычице, и сим толико прогневаста Бога, яко праведным судом Его тяжкими недугами наказание прияста. Мы же, таковое вразумление видяще, с любовию поклоняемся Твоему образу, зывающе Богу: Аллилуиа.

Икос 9

Вития века сего отрицают поклонение иконе Твоей, Пречистая Дево: не разумеют бо в своем суемудрии, яко честь, иконе воздаваемая, на Первообразная восходит. Мы же, не токмо сие ведуще, но и благодеяния, иконою Твоею нам являемии, видевши, душою радующеся, Тебе, Богородице, глаголем:

Радуйся, Стамно всезлатая, в ней же Плоть и Кровь Божественного Агнца уготовися;

Радуйся, Трапезо святая, Хлебом Жизни нас питающая.

Радуйся, суетную мудрость нечестивых витий посрамляющая и ослепленных ею на путь правый наставляющая;

Радуйся, яко по благостыне Своей угашаеши в нас огонь нечестия пламенем огня Божественного.

Радуйся, вразумляющая знаменми и чудесы колеблемых в вере;

Радуйся, Богоблагодатная, страх Божий и смирение в сердца наша вселяющая.

Радуйся, Владычице, милость Свою нам и заступление являющая.

Кондак 10

Спасти хотя люди, покланяющиеся Твоей иконе, от бед, благоволила еси, Богородице, явиться некоей девице, в Лужецком, близ града Можайска, монастыре жительствовавшей, и предварити да не имать общения с женою развращенною, и тем сохранила еси ю от грядущия беды. Темже и мы прославляем Господа Бога, давшаго благодать таковую иконе Твоей, и вопием Ему: Аллилуиа.

Икос 10

Стена еси крепкая, ограждающая род человеческий от бед, Пресвятая Богородице; бо скорую помощь являеши от Твоея иконы всем, чтущим ю во градах, весех и обителех. Сего ради и мы, осеняеми Твоим, Богомати, заступлением, на Твой взирающе пречистый образ, молим Тя: да избавиши ны от всяких клевет, бед и скорбей, вопиющих Тебе:

Радуйся, явльшая миру Обетованнаго Сокрушителя главы змиевы;

Радуйся, радость вечную — Спасителя миру Рождшая.

Радуйся, рождением Сына Божия двери Царствия Христова нам отверзшая;

Радуйся, казнь Божию за беззакония наша от глав наших отклоняющая.

Радуйся, любящих и чтущих Тя от всяких бед и скорбей избавляющая;

Радуйся, Радосте всего мира, Еюже слезы скорбящих отъемлются.

Радуйся, Владычице, милость Свою нам и заступление являющая.

Кондак 11

Пение непрестанное приношаше Ти, Пресвятая Богородице, некий житель Жиздринския веси, с верою пред Твоею иконою молящися, да даруеши ему дочь. Ты же, Богородице, благоволила еси вняти мольбам его и даровала еси ту ему. Мы же, зряще Твою икону и видяще токи чудес, от нея изливаемии, Благая Богородительнице, из глубины сердца благодарим Тя, Царицу нашу Дивную, воспевающе Богу: Аллилуиа.

Икос 11

Светлыми лучами чудес икона Твоя сияет, Богомати Пречистая, и прогоняет всякое вражие действо силою Божиею, от Нея исходяще; темже и мы, грешнии, имуще таковое знамение Твоего к нам благоволения, радуемся, глаголюще: о Пресвятая Богородице! Умоли Господа, да спасет ны имиже весть судьбами, да не погибнем в нераскаянии о наших грехопадениях, и услыши похвалы сия, Тебе возносимии:

Радуйся, Творца Небесе и земли безсеменно воплотившая;

Радуйся, осенением святых иконы Твоея всякое вражие действо от нас отгоняющая.

Радуйся, прошения наша на пользу исполняющая;

Радуйся, неоскудеваемый источниче милостей Божиих к людем Твоим.

Радуйся, благочестивых супружеств незримое ограждение;

Радуйся, молитв ради усердных плод безчадным
ниспосылающая.

Радуйся, Владычице, милость Свою нам и заступление
являющая.

Кондак 12

Благодать умиления молитвенного, от Твоея, Владычице,
иконы источаемая, да исполнит души наша, аще и грех ради в
безчувствие впадаем. Пробуди наше душевное усыпление, да не
погибнем люте без покаяния, и прими нас в вечные кровы,
Богородительнице, да радуешься, поем Богу, Тобою нас
спасающему: Аллилуиа.

Икос 12

Поюще чудеса, являеми от Твоея иконы, Мати Христа Бога
нашего, и припадающе к ней, молим Тя, Владычице: буди нам
защитение в день кончины нашея, егда имамы предстати на суд
пред страшным Престолом славы Сына Твоего, Господа нашего, да
вопием Ти:

Радуйся, от власти лютаго миродержца уповающих на Тя
избавляющая;

Радуйся, гнев Божий от рода православнаго отводящая.

Радуйся, благую христианскую кончину ублажающим Тя
подающая;

Радуйся, славящих Тя на воздушных мытарствах заступающая.

Радуйся, Заступнице Усердная рода православнаго и крепкая
надеждо вечнаго его спасения;

Радуйся, отверзающая райские двери православному роду,
присно Тя блажашему.

Радуйся, Владычице, милость Свою нам и заступление
являющая.

Кондак 13

О Всепетая Мати Христа Бога нашего! Приими милостивно сие
моление наше, еже принесохом пред Твоею иконою, и в час
смертный явился нам Сама, Пречистая, простирающи руку помощи, и
отгоняющи духи злобы, ищущи поглотити души наша, и умоли
Приснопокланяемую Троицу избавити ны мучения вечнаго, да
предстательством Твоим наследуем Царствие Небесное и
сподобимся со святыми пети Богу: Аллилуиа.

Этот кондак читается трижды, затем икос 1-й и кондак 1-й

Молитва ко Пресвятой Богородице перед Ея иконой, именуемой «Калужская»

О Пресвятая Дево, Мати Христа Бога нашего, Дивная Царице
Небесе и земли! Вонми многоболезненному вздыханию сердец
наших; призри с высоты святая Твоея на нас, с верою и любовью
предстоящих пред чудотворною Твоею иконою и со умилением
молящихся Тебе, Владычице! Не предаждь умалению Церковь
Православную, помози нам, Пресвятая Богородице, святоотеческую
Православную веру до конца дней наших непорочно сохранить, во
всех заповедех Господних неуклонно ходити и избави ны от
пагубных душевредных учений. На Твою, Дивная Царице Небесе и
земли, милость уповаем, раби Твои: очисти умы наша от

греховных помыслов, душевного расслабления, обуревания страстей, от искушений, соблазнов и грехопадений; Ты бо еси, Владычице, крепкое прибежище грешников кающихся. Воздвигни нас из глубины греховных и истинным покаянием ороси изсохшая сердца наша, просвети сердечная очеса наша ко зрению спасения, и прельщенных бесовскою прелестию на путь правый настави; всякое дело злое и богопротивное разруши; всякому же благому и богоугодному делу научи и споспешествуй; вложи, Владычице, в сердца наша дух страха Божия, дух благочестия, дух кротости, смирения, терпения, незлобия; умягчи злая сердца наша и ниспосли нам ревность о спасении ближних наших. Вразуми и научи ны, о Всемилостивая Заступнице наша, како безгрешно ходити по пути земнаго сего жития: яко Ты, Пресвятая, веси веру нашу, и упование наше видиши. О Владычице мира! Скорбящих утеши, бедствующим помози; сохрани от молниеноснаго грома, тлетворных ветр, лютых болезней, смертоносных язвы, междоусобных брани, нашествия врагов иноплеменных. О Пресвятая Богородице! Избави ны от внезапных и насильственных смертей; всем нам даруй обращение на путь истинный и христианскую кончину живота нашего безболезненну, непостыдну, мирну, Святых Тайн причастну. Во время исхода нашего предстани нам, Дево Богородице, и избави ны от власти бесовския, воздушных горьких мытарств и огня вечнаго. Скончавшимся внезапною смертию милостива быти Сына Твоего умоли, и о всех усопших, иже не имут сродников, о упокоении их Сына Твоего умоляющих, Сама буди непрестанная и теплая Молитвенница и Ходатаица. Преставльшихся же в вере и покаянии от временнаго жития сего отцы, братию, матери и сестры наша сподоби Твоим ходатайством вселиться во обителях Небесных со Ангелы и со всеми святыми, идеже непрестанно гласы празднующих и радостно славящих Пресвятую Троицу, Отца, и Сына, и Святаго Духа, ныне и присно и во веки веков. Аминь.

Молитва иная (во время крестного хода)

О Пресвятая Владычице Богородице, Царице Небеси и земли! К Тебе прибегаем и к Твоей помощи взываем: сохрани землю нашу от нашествия врагов иноплеменных, и от всякия болезни душевныя и телесныя, и от смертоносных язвы, да всегда поем, величаем и славим Тя, Пресвятую Богородицу, яко благоую и Дивную Заступницу нашу во веки веков. Аминь.

Тропарь Пресвятой Богородице перед Ея иконой, именуемой «Калужская»

Тропарь, глас 4:

Заступнице от враг иноплеменных Необоримая Калужския земли, и Избавительнице от смертоносных язвы Милостивая! Избави рабы Твоя от всяких бед и болезней, с верою и любовию прибегающия к чудотворней иконе Твоей, и спаси души наша.

Кондак, глас 6:

Не имамы песней, ниже словес, како достойно восхваляти Тя, Мати Христа Бога нашего, явления ради чудотворных иконы Твоя земли Калужстей, токмо можем вопити Тебе: не отврати милости Твоя от нас, и ниспосли ю всем притекающим к

цельбоносней иконе Твоей.

Величание

Величаем Тя, Богородице Дево, и почитаем чудотворную икону Твою, еуже благоволила еси спасти землю Калужскую от нашествия вражиих и всегубительных болезней.

Празднование 18/31 июля (местное), 2/15 сентября, 12/25 октября и в первое воскресенье Петрова поста